



換工

孔子講：「禮失而求諸野」，係講時代變化真緊，文化抑係風俗若失去，無定著在較掖僻个所在猶有保留。換工，在工業時代真罕見，毋過在成過農業社會係真普遍个。像蒔田、掌草、割禾、捋瓜、割菜、鬥鬧熱、鬥相共，攞係靠換工。照《孟子·滕文公篇》內底講个：「詩云：『雨我公田，遂及我私。』惟助為有公田。由此觀之，雖周亦助也。」換工真有西周井田制度大家作埕作穡、耕田个影留落來。

成過蒔田步步靠人工，對撩秧子、擔秧擔行田塍、蒔田、輪輪仔，這兜若毋係共莊人無即係自家个親戚。大家你加佢做，佢加你做無計較。尤其係蒔田師傅在蒔田个時，猶會比哪儕蒔較緊，著面蒔，著面講事，著面拚緊，真緊即會經著田慢慢青起來啊。俛半晝時，猶有主人家特別準備个鹹糜，食起來特別好食，大家拚著三、四碗。早冬禾个掌草，實在真艱難，又溼又熱，手愛掌草，腳愛爬，腰痠到硬討斷去，大家嘛係愛刻耐做。

捋瓜个時，係大家頭歡喜个，雖然講愛打早四點出即愛出門。飯旨食，毋過坐在里阿卡面上食著白白个土司嘛真歡喜。到田个時，天甫光，靠著經驗枷車嶼个物件搬落車，鋪布帆、笠婆戴好，一手擎剪，一手攞水桶落田捋美濃瓜。若捋著得蜂叮抑係必箍个，這時務隨提起弓蕉刀枷皮削削个，即食起來，遐款甜甜个滋味到今想著猶擱會得人猶念。等瓜捋好裝籠，一兜打起來个穰瓜即會得來鬥捋个人提轉去。所以瓜期時，逐日攞有食毋會了个瓜。有時務若鬥捋金蘭抑係小玉西瓜，即有西瓜好食，實在全然好。

莊底若有人渡新娘辦桌，歸莊大家來鬥鬧熱，裁竹、搭布帆、借八仙桌、長凳、碗公這兜攞在前一日即攞愛辦好。遐暗夜食閒頓个時，鬥鬧熱个人大家即在遐作埕食飯，有講有笑，細子人在遐走來走去，實在全然鬧熱。反轉日，更加鬧熱，像係歸莊在辦喜事，大家歡頭喜面來去得人請。等鬧熱過後，大家鬥收桌，枷菜尾漕落大鑊，園真多鹹菜、筍乾、丸子煮得佢滾滾，有一組人即用鉛桶扛菜尾去莊底分，遐暗夜桌嶼即擱加一落有鹹菜、筍乾味个菜。現時工業時代，這兜換工無去啊，成過對莊頭熟到莊尾，現時多了交際應酬，嘎欠了人情味。

作者：李秉璋

☆詞彙學習☆

【掖僻】iab` pia`：偏僻。

【掌草】soo` coo`：將稻田中雜草拔除後用力壓入泥中使死亡。

【鬥鬧熱】deu` nau` ngied`：指幫忙喜慶事。

【鬥相共】deu` siong` kung`：原指幫忙喪事，今喜、喪皆稱「鬥相共」。

【詩】shi`：指《詩經》。

【助】cu`：井田制八家共耕公田，是為「助」。

【步步】pu pu`：樣樣。

【撩秧子】leeu` rhiong` zu`：用秧鏟將秧苗鏟起以便插秧用。

【秧擔】rhiong` dam`：以鐵線或竹篾所編用來挑秧苗的擔子。

【田塍】teen` shin`：田埂。

【刻耐】kad` nai`：堅辛忍耐地硬撐下去。

【里阿卡】li` a` ka`：原為兩輪人力搬運車，後改良為加在機車或鐵牛尾端以載運貨物。

【得蜂叮】ded` pung` den`：被果蠅產卵寄生。

【必箍】bid` keu`：指瓜果類過度成熟以致在蒂頭附近產生裂痕。

【閒頓】heen` dun`：喜宴前一晚的宴客。